

## ԻՐԱՎՈՒՆՔԻ ԶԱՐԳԱՑՈՒՄ, ԴԻՆԱՄԻՉՄ

Հասարակական հարաբերություններին զուգահեռ՝ զարգանում է նաև իրավունքը, փոխվում իրավաընկալումը, հետևաբար, առաջանում են **նոր իրավունքներ** կամ գոյություն ունեցող իրավունքների վերաբերյալ **նոր ընկալումներ (բովանդակություն)**, չէ որ իրավունքը դինամիկ երևույթ, կենդանի օրգանիզմ է:

Նորմատիվ հարթությունում **իրավունքի դինամիզմին** է անդրադարձել նաև Մարդու իրավունքների եվրոպական դատարանը (այսուհետ նաև՝ ՄԻԵԴ), մասնավորապես՝ երբ որևէ նորմի (կոնվենցիոն դրույթի) վերաբերյալ նոր մեկնաբանություն է ներկայացնում, ՄԻԵԴ-ը նշում է, որ «Մարդու իրավունքների և հիմնարար ազատությունների պաշտպանության մասին» եվրոպական կոնվենցիան **կենդանի փաստաթուղթ** է<sup>1</sup>, որը պետք է մեկնաբանվի **փոփոխվող սոցիալական, իրավական և տեխնոլոգիական պայմանների** լույսի ներքո, որպեսզի այն լինի **գործնական և արդյունավետ**: Իրավունքը բնորոշելով որպես «կենդանի օրգանիզմ»՝ դրանով իսկ հիմնավորվում է իրավունքի նորովի ընկալումը, այդ թվում՝ օրենքի **նորովի մեկնաբանումը**՝ միևնույն ժամանակ հիմնավորելով նույն նորմի վերաբերյալ նախկինում տրված այլ մեկնաբանությունները (իհարկե, նպատակահարմարությամբ չպայմանավորված), ինչը և ապացուցում է իրավունքի դինամիկ լինելը:

Համանման բովանդակությամբ կարգավորում առկա է նաև ՀՀ իրավական համակարգում: Մասնավորապես, «Սահմանադրական դատարանի մասին» ՀՀ **սահմանադրական օրենքի**<sup>2</sup>

<sup>1</sup> Տե՛ս ECtHR Judgement *Tyer v. The UK*, 25.04.1978, paragraph 31, ECtHR Judgement *Burghartz v. Switzerland*, 22.02.1994, paragraph 28, ECtHR Judgement *Kress v. France*, N 39594/98, paragraph 70, ՄԻԵԴ վճիռ Բայաթյանի ընդդեմ Հայաստանի, գանգատ 23459/03, պարագրաֆ 62:

<sup>2</sup> 1995 թվականին ընդունված ՀՀ Սահմանադրության 2015 թվականի փոփոխություններով և լրացումներով ներդրվեց «**սահմանադրական օրենք**» ձևակերպումը:

Համաձայն ՀՀ Սահմանադրության 103-րդ հոդվածի 2-րդ մասի՝ Ազգային ժողովի կանոնակարգը, Ընտրական օրենսգիրքը, Դատական օրենսգիրքը, Սահմանադրական դատարանի մասին օրենքը, Հանրաքվեի մասին օրենքը, Կուսակցությունների մասին օրենքը և Մարդու իրավունքների պաշտպանի մասին օրենքը **սահմանադրական օրենքներն** են (...):

✓ 68-րդ հոդվածի 16-րդ մասի 2-րդ կետի համաձայն.

«16. Սահմանադրական դատարանը սույն հոդվածի 9-րդ մասի 1-ին և 2-րդ կետերով նախատեսված **որոշումները** (...) համապատասխան դիմումի հիման վրա **կարող է վերանայել, եթե՝ ի հայտ է եկել տվյալ գործով կիրառված՝ Սահմանադրության դրույթի այնպիսի նոր ընկալում**, որի առկայությամբ նույն հարցի վերաբերյալ կարող է ընդունվել Սահմանադրական դատարանի այլ որոշում, և տվյալ հարցն ունի **սկզբունքային սահմանադրափրավական նշանակություն**»:

✓ 68-րդ հոդվածի 9-րդ մասին 1-ին և 2-րդ կետերի համաձայն.

«9. Սույն հոդվածի 1-ին մասում նշված գործերով Սահմանադրական դատարանը կարող է ընդունել հետևյալ որոշումներից մեկը.

1. վիճարկվող ակտը կամ դրա վիճարկվող դրույթը **Սահմանադրությանը համապատասխանող** ճանաչելու մասին.

2. վիճարկվող ակտը կամ դրա վիճարկվող դրույթը **Սահմանադրական դատարանի մեկնաբանությամբ Սահմանադրությանը համապատասխանող** ճանաչելու մասին.

(...):»:

✓ 68-րդ հոդվածի 1-ին մասի համաձայն.

«(...) կարող է վիճարկվել Սահմանադրության 168-րդ հոդվածի 1-ին կետով<sup>3</sup> նախատեսված ինչպես **նորմատիվ**, այնպես էլ **անհատական բնույթ ունեցող իրավական ակտերի սահմանադրականությունը**, (...):»:

---

Այսինքն՝ «**սահմանադրական օրենք**» ասելով անհրաժեշտ է հասկանալ << Սահմանադրության 103-րդ հոդվածի 2-րդ մասում նշված **7 իրավական ակտերը**:

<sup>3</sup> Ըստ << Սահմանադրության 168-րդ հոդվածի 1-ին կետի՝ Սահմանադրական դատարանը Սահմանադրական դատարանի մասին օրենքով սահմանված կարգով՝

1) որոշում է **օրենքների, Ազգային ժողովի որոշումների, Հանրապետության նախագահի հրամանագրերի և կարգադրությունների, Կառավարության և վարչապետի որոշումների, ենթաօրենսդրական նորմատիվ իրավական ակտերի** համապատասխանությունը Սահմանադրությանը:

Վերը նշված իրավանորմերի վերլուծությունից բխում է, որ ՀՀ սահմանադրական դատարանը իրավասու է (կարող է) վերանայել իր՝ նախկինում կայացրած որոշումները հետևյալ **2 պահանջի միաժամանակյա առկայության** դեպքում, եթե՝

- 1) ի հայտ է եկել տվյալ գործով կիրառված՝ Սահմանադրության դրույթի նոր ընկալում, այսինքն՝ **սահմանադրության դրույթի (սահմանադրական նորմի) նորմի նոր բովանդակություն, ընկալում**, ինչը իրավունքի զարգացման, դինամիզմի արդյունք է, և
- 2) հարցն ունի սկզբունքային սահմանադրաիրավական նշանակություն, այսինքն՝ այստեղ կարևորվում է հարցի, **հիմնախնդրի կարևորության աստիճանը, սկզբունքային լինելը**:

Հետևաբար, եթե դիմել են ՀՀ սահմանադրական դատարան՝ նախկինում կայացրած որոշման **վերանայման համար**, ապա ՀՀ սահմանադրական դատարանը գնահատում է վերը նշված 2 պահանջի միաժամանակյա առկայության հարցը: Ենթադրենք այնպիսի դեպքում, երբ **առկա է կիրառված սահմանադրական դրույթի նոր ընկալում**, բայց **հարցը չունի սկզբունքային սահմանադրաիրավական նշանակություն**, ապա որոշումը չի վերանայվի:

Նկատենք, որ թե՛ «**սահմանադրական դրույթի նոր ընկալում**», թե՛ «**հարցի սկզբունքային սահմանադրաիրավական նշանակություն**» ձևակերպումները գնահատողական են:

Նոր իրավունքների ամրագրումը կամ դրանց վերաիմաստավորումը, ի թիվս այլ գործոնների, կապված է նաև **իրավունքի զարգացման** հետ: Իրավաբանական գրականության մեջ երբեմն նշվում է **իրավունքի կայուն զարգացման** մասին<sup>4</sup>:

Իրավունքի զարգացումը կապված է նաև **ժամանակի հետ**, քանզի այդ փոփոխությունը տեղի է ունենում ժամանակի ընթացքում, ավելին՝ այն ժամանակի

---

<sup>4</sup> Տե՛ս <http://cisdl.org/public/docs/What%20is%20Sustainable%20Development.pdf>:

պահանջի արդյունքում է ծավալվում, իսկ ժամանակը, ինչպես նշում է Ժան Լուի Բերժելը, **էվոլյուցիայի և կայունության գործոն** է<sup>5</sup>:

Կարծում ենք՝ իրավունքի զարգացման արդյունք են նաև **սերունդների իրավունքները**<sup>6</sup>:

Անդրադառնալով սերունդների իրավունքների դասակարգմանը, որը, կարծում ենք, ժամանակավրեպ է և միայն որոշ տեսական ուսումնասիրությունների ժամանակ է օգտագործվում, նշենք, որ, ըստ Տ. Լանդմանի, առաջին, երկրորդ և երրորդ սերնդի իրավունքների շրջանակում հաշվվում է 58-64 իրավունք<sup>7</sup>:

Չքննարկելով յուրաքանչյուր սերնդի իրավունքների առանձնահատկությունները՝ նշենք, որ **սերունդների իրավունքները տարբերվում են իրենց պաշտպանության մեխանիզմներով**, օրինակ՝

✓ առաջին սերնդի իրավունքները **հիմնականում բացարձակ են, սահմանափակման ենթակա չեն, և պետությունը պարտականություն ունի** ապահովելու այդ իրավունքների արդյունավետ իրականացումը, օրինակ՝ կյանքի իրավունքը,

✓ երկրորդ սերնդի իրավունքները **կարող են սահմանափակվել**, քանզի այդ իրավունքների իրականացումը կապված է **պետության հնարավորությունների հետ**, օրինակ՝ սոցիալական իրավունքները,

---

<sup>5</sup> Տե՛ս Բերջել Ժան-Լուի, *Общая теория права*, под общей редакции В. Даниленко, перевод с французского Г. Чуршукова, Москва, 2000, стр. 200.

<sup>6</sup> Իրավաբանական գրականության մեջ առկա են մարդու իրավունքների դասակարգման տարբեր համակարգեր, օրինակ՝

- ✓ դասական (**պետության նեգատիվ պարտավորություն**) և սոցիալական իրավունքներ (**պետության պոզիտիվ պարտավորություն**),
- ✓ **կոլեկտիվ և անհատական** իրավունքներ,
- ✓ **իրավունքներ և ազատություններ**,
- ✓ քաղաքացիական և քաղաքական (**առաջին սերունդ**) իրավունքներ,
- ✓ սոցիալական, տնտեսական և մշակութային իրավունքներ (**երկրորդ սերունդ**),
- ✓ ժողովրդի, կոլեկտիվ իրավունքներ (**երրորդ սերունդ**), (Տե՛ս Морозова Л., *Теория государства и права*, учебник, 4-е издание, Москва, 2012, стр. 146.):

<sup>7</sup> Տե՛ս Landman T., *Studying Human Rights*, New York, 2006, page 16.

✓ Երրորդ սերնդի իրավունքներն արդեն ենթադրում են ոչ միայն **պետության ինստիտուցիոնալ օժանդակություն**, այլ նաև անհրաժեշտ է որոշակի չափով **սահմանափակել** (Երբեմն անվանվում է «պոզիտիվ սահմանափակում») առաջին կամ երկրորդ սերնդի իրավունքները, օրինակ՝ առողջ և մաքուր միջավայրում ապրելու իրավունքը՝ որպես հավաքական իրավունք, ենթադրում է, որ **հնարավորինս պետք է սահմանափակվի անտառների օգտագործումը**, աշխատանքի իրավունքը<sup>8</sup>:

Բացի այդ, այսօր միատեսակ մոտեցում առկա չէ մարդու իրավունքների չորրորդ սերնդի վերաբերյալ: Ոմանք նշում են, որ դրանք այն իրավունքներն ու ազատություններն են, որոնք կապված են **կլոնավորման, բիոլոգիայի ոլորտից բխող հարցերի իրավական կարգավորմանը**, ոմանք այդ իրավունքները դասում են **առաջին սերնդի իրավունքների շարքը**, ոմանք նշում են, որ դրանք այն իրավունքներն ու ազատություններն են, որոնք կապված են **տեղեկատվության և ինֆորմացիոն տեխնոլոգիաների հետ**<sup>9</sup>: Երբեմն էլ նշվում է, որ չորրորդ սերնդի իրավունքները կապված են **գենային ինժեներիայի հետ**, այդ իրավունքները պատկանում են ոչ թե անհատին կամ կոլեկտիվին, այլ **ամբողջ մարդկությանը**<sup>10</sup>:

Հավելենք, որ իրավաբանական գրականության մեջ դեռևս հստակ մոտեցում չկա՝ մարդու սոմատիկ իրավունքներն առանձին խումբ իրավունքներ են (որպես չորրորդ սերնդի իրավունքներ), թե առաջին սերնդի իրավունքներից բխող իրավունքներ<sup>11</sup>:

Ընդգծելով, որ այսօր գիտական բանավեճային շրջանակում է գտնվում չորրորդ սերնդի իրավունքների հարցը, միևնույն ժամանակ պետք է փաստել, որ

---

<sup>8</sup> St'u Cornescu A., The generations of human's rights, days of law: the conference proceedings, 1st edition. Brno, Masaryk University, 2009, p. 6:

<sup>9</sup> St'u Рудинский Ф., Права человека в современном мире, Марксизм и современность, N 1 (15), Москва, 2000, стр. 37-49.

<sup>10</sup> St'u Cornescu A., The generations of human's rights, days of law: the conference proceedings, 1st edition. Brno, Masaryk University, 2009, p. 7:

<sup>11</sup> St'u <https://mitso.by/web/uploads/ckeditor/1510126492.pdf>:

գիտատեխնիկական առաջընթացը (հատկապես՝ բժշկության, գենետիկայի ոլորտներում) ստիպում է, որպեսզի ուսումնասիրենք նոր սերնդի իրավունքների կարգավորման հարցերը, ընդ որում՝ սրանք այն իրավունքներն են, որոնք բխում են մարդու անձեռնմխելիությունից, այդ իրավունքների հենքն առաջին և երկրորդ սերնդի իրավունքներն են, որոշ դեպքերում պայմանավորված են բժշկագիտության, գենային ինժեներիայի զարգացումներով, ենթակա են պոզիտիվացման:

Անհրաժեշտ է հստակ ամրագրել այդ իրավունքների պաշտպանության մակարդակը, այդ իրավունքներին պետության միջամտության սահմանները: Տեղին է հիշել պրոֆեսոր Գ. Սաֆարյանի այն տեսակետը, որ **իրավունքը և իրավական կարգավորումը** հասարակական հարաբերությունների սոցիալական կանոնակարգման **հիմնական միջոցներն** են<sup>12</sup>:

Հետաքրքրական է նաև իրավագետ Ֆ. Ռիբավեմի տեսակետը, ով, անդրադառնալով տարբեր իրավական թեմաների ուսումնասիրման անհրաժեշտությանը, ընդգծում է, որ բիոտեխնոլոգիայի տեսանելի զարգացումները, հատկապես վերջին երկու տասնամյակում, **թույլատրում և պահանջում են դասական իրավական ինստիտուտների վերանայում**<sup>13</sup>:

---

<sup>12</sup> Տե՛ս Սաֆարյան Գ., Իրավաստեղծ գործունեության և օրենսդրության զարգացման հիմնահարցերը Հայաստանի Հանրապետությունում (պատմա-տեսական վերլուծություն), Երևան, 2004, էջ 69:

<sup>13</sup>Տե՛ս Rivabem F., Biodireito: uma disciplina autônoma?, 2017, [http://scielo.br/scielo.php?script=sci\\_arttext&pid=S1983-80422017000200282&lng=pt&tlng=pt](http://scielo.br/scielo.php?script=sci_arttext&pid=S1983-80422017000200282&lng=pt&tlng=pt):